

Colonialistanan a rabia

ORANJESTAD(AAN) Ayera atrobe tabata tin algun hende cu a kere cu nan por a haci uzo di e ocasion pa asina bin tilda DIARIO di ta anti Hulanda y nan tabata yama pa asina defende algo cu no mester di defensa.

Te hasta algun miembro di prensa na Aruba a haya cu nan mester a bay comenta riba e caso di Van der Velden y cu DIARIO ta lastra Hulandesnan siendo cu esaki no ta e caso.

DIARIO ta bisa publicamente cu nos ta contra tur Colonialista Hulandes y contra politica di Colonialismo cu durante siglonan a demostra, cu tal politica ta basa riba tene e Arubiano y su cultura domina pa e no progresa.

E lucha pa Status Aparte tabata tin di haber cu dominio cu tabata ser imponi door forzanan agheno y ta pesey e pueblo e tempo ey a lanta bao guia di Libertador, señor Betico Croes pa bringa pa e derecho di por ta Baas den nos mesun cas.

Ningun Arubiano cu ta sinti su mes Arubiano y cu ta stima su pais, por bay defende colonialistanan djis pa e solo hecho cu nan tambe ta Hulandes Europeo.

DIARIO ta pone su lucha y su pensamiento combina cu loke ta reina den pueblo riba papel, pa asina tur hende por lesa y controla esaki y loke tin poni riba papel ta bisto pa un y tur, pero tin un diferencia grandi entre lesa loke ta skirbi y lesa loke bo kier lesa.

Tur esnan cu ayera tabata cuestiona cu ta anti macamba DIARIO tabata den su articulo contra Van der Velden, cual articulo DIARIO ta keda para su tras, a actua basa riba pensamentonan premedita pasobra e asunto aki no tin nada di haber cu discriminacion di Hulandesnan Europeo biba na Aruba o na Hulanda.

For di hopi Hulandes Europeo, DIARIO a haya reaccion di sosten pa cu e caso contra Van der Velden pasobra Hulandesnan biba na Aruba ta haya cu loke Van der Velden y su grupito ta haci, ta nada otro cu dañe e relacion bon cu Hulandesnan tin cu e pueblo di Aruba.

E pueblo di Aruba no tin ningun problema cu e pueblo Hulandes y menos cu esnan cu ta biba aki y cu ta stima Aruba mes hopi cu Arubianonan y cu a demostra bon cla cu nan no ni kier bolbe nan pais pasobra aki nan ta biba

den un paraiso compara cu Hulanda y e trato cu nan ta haya di Arubianonan nan no ta haya nan nan mesun pais.

Tin hende cu ta asina preocupado pa nan paspoort Hulandes cu cualkier critica cu por tin riba colonialistanan Hulandes, ta laga nan spanta y tembla di miedo cu mayan nan por perde nan paspoort Hulandes, siendo cu esaki ta algo ridiculo.

Ta e mesun hendenan aki cu awor kier papia di discriminacion, ta esnan cu ta critica tur loke ta Latino y awor cu DIARIO a critica colonialistanan racista, algun hende cu ta yama nan mes Arubiano, ta core sali na vanguardia di colonialistanan.

Tempo cu Bolkestein a insulta henter pueblo di Aruba y cu Henny Eman como lider di gobierno no a existi di Bolki pa e pidi disculpa, e mesun hendenan aki no a reacciona emocional: no e tempo ey nan a keda keto y guli manda abao pasobra ta un Hulandes racista a papia!!

E gran parti di pueblo di Aruba no a guli e insulto aki y nan a reacciona cerca DIARIO como e matutino cu ta para firme y defende tur

loke ta Aruba den tempo bon y den tempo malo.

E Juf di ATV cu a yama pa asina zundra ayera cu DIARIO ta anti Hulandes: unda bo a keda cu bo ATV dia cu Bolkestein a yama nos tur aki na Aruba incluyendo bo mes y bo yiunan pa Ro-versnest?

Si bo tin tanto problema cu loke DIARIO a publica en cuanto colonialistanan, anto bay dilanti di camera di ATV awe anochi mes y defende abiertamente Van der Velden y defende tur e colonialistanan cu DIARIO a critica, haciendo uzo di e medio di comunicacion pa cual bo mes ta traha y cual medio tambe tin tur derecho di libertad di expresion y no bin zundra na DIARIO pasobra bo ta bati riba porta robez.

Si bo ta menaza di termina bo abonement di DIARIO pasobra supuestamente e matutino aki ta anti Hulandes cual no ta e caso pasobra DIARIO no ta discrimina ningun hende, anto termina bo abonement y bay busca un abonement cerca Enemigo di Aruba cu lo ta skirbi mas na bo amen y di colonialistanan!

E diferencia ta sinta den sali abiertamente pa dilanti pa defende loke ta di Aruba manera cu DIARIO ta haci y lo sigui haci o sconde manera otronan tras di telefoon y ora cu yega e momento pa para fuerte y muestra cara, diripiente miedo ta dal den curpa y tin miedo pa muestra cara na pueblo.

Laga cada ken cu ta traha pa

cualquier medio na Aruba, haci uzo di su libertad di expresion y bisa pueblo abiertamente ta ken nan ta sosten; Aruba y su pueblo o colonialistanan cu tin e solo meta pa re colonialista e pueblo aki cu lo haya su mes ta bolbe baha cabez y bisa Ja Baas, Nee Baas.

Parlamento mester para Rijkswet riba Douane

ORANJESTAD(AAN) E fastball cu Hulanda kier pasa riba cabez di Douane di Aruba, no mester worde acepta door di parlamento di Aruba pasobra den e concepto di e ley aki cual DIARIO a haya copia di dje, tin algun punto sumamente delicado cu sigur parlamento di Aruba mester ta cauteloso cune.

E parti cu ta mishi cu religion, rasa, color politico, arte

di e persona y te hasta su sexualidad, ta puntonan asina delicado y partinan cu tin di haber cu derechonan fundamental di privacidad, cu no asina facil por ser poni den man di departamentonan pafor di Aruba.

Durante diano venidero DIARIO lo bin cu mas informacion riba e Rijkswet aki cu ta otro ley di Reino cu ta hopi cuestionable.

CARTERANAN DI CALIDAD!!

